



SERVISIO METEOROLOGIKO DI ANTIANAN HULANDES I ARUBA

Seu Mahum z/n KORSOU, Antianan Hulandes
Tel: +599 9 839 3366 Fax: +599 9 868 3999

KOMUNIKADO PA PRENSA

UN TEMPORADA DI ORKAN TRANKIL, TE AINDA

Áwaseru durante di yùli 2009 tabata bastante bou di normal (57%) na hopi lugá na espezialmente Kòrsou i Boneiru (Aeropuerto Hato na Kòrsou: 23.0 mm kontra di un promedio pa yùli di 40.2 mm). Un eksepshon riba esaki tabata Aruba ya ku einan e kantidat di awa tabata bastante riba normal (70%). Na Aeropuerto Reina Beatrix a midi 52.8 mm kontra di un promedio pa luna di yùli di 30.7 mm. Na Islariba tambe a kai ménos awa ku kustumber (58%), kaminda ku na Aeropuerto Prensès Juliana a midi 41.6 mm miéntras ku e promedio pa yùli einan ta 71.6 mm.

Te ku fin di yùli di e aña aki no a forma ningun tormenta tropikal òf orkan ainda riba e Region di Orkan di Atlántiko. E promé depreshon tropikal (di durashon kòrtiku) di aña a logra di forma for di final di mei pero despues di esei a keda hopi trankil. Pa promedio, den lunanan di yùni i yùli huntu ta forma 1.6 siklon tropikal (tormenta tropikal i orkan) riba Osean Atlántiko, Laman Karibe i Golfo di Mexico. Aña pasá (2008) durante di e mesun periodo aki ya a forma 4 siklon tropikal riba e region aki, di kua dos a alkansá forsa di orkan. Un di nan (Bertha) asta a bira un orkan di kategoria tres.

Temperatura di laman den Área di Karibe i e parti tropikal di Osean Atlántiko durante di último simannan a subi un tiki te na balornan normal pa tempu di aña. E desaroyo aki ta favorabel pa formashon di nubia di áwaseru i pa desaroyo di siklon tropikal den e regionnan aki.

Opservashonnan den e parti tropikal di Osean Pasífiko ta indiká ku temperatura di awa einan ta sigui subi. Esei ta enserá sin embargo ku e famoso fenómeno El Niño a regresá i ta antisipá ku e lo sigui gana na intensidat durante di próksimo lunanan. Pa e motibu aki ta pronostiká ku e kantidat di áwaseru riba parti sùit di Área di Karibe (inklusio Islanan ABC) i parti nort di Sur Amérika lo ta ménos ku kustumber. E kantidat di siklon tropikal riba Region di Orkan di Atlántiko tambe lo keda suprimí e aña aki (dies tormenta tropikal, kuater orkan i dos orkan fuerte). Pa Islariba ta antisipá durante di e mesun periodo aki un kantidat di áwaseru ku ta mas o ménos normal.
